

# Америка Қўшма Штатларининг John Deere компанияси Тошкент ирригация ва қишлоқ хўжалигини механизациялаш муҳандислари институти билан ҳамкорликда олий ўқув юртида ўқув марказини ташкил этди.

☒ Америка Қўшма Штатларининг John Deere компанияси Тошкент ирригация ва қишлоқ хўжалигини механизациялаш муҳандислари институти билан ҳамкорликда олий ўқув юртида ўқув марказини ташкил этди. Шу муносабат билан ТИҚҲММИда тантанали очилиш маросими бўлиб ўтди. Унда Бош вазир маслаҳатчиси, «Ўзагротехсаноатхолдинг» АК раиси Нодир Отажонов, Олий ва ўрта-маҳсус таълим вазири Иномжон Мажидов, CIS Equipment Group раҳбари Жейсон Ҳант, АҚШнинг Ўзбекистондаги элчихонаси, John Deere компаниясининг Ўзбекистондаги расмий дилери – Landtech компанияси вакиллари ҳамда институт профессор-ўқитувчилари ва талабалари иштирок этди.



Таъкидлаш ўринлики, John Deere компаниясининг мазкур ўқув маркази Ўзбекистон Республикаси Президенти Ш.Мирзиёев томонидан 2019 йил 31 июлда имзоланган «Қишлоқ хўжалиги машинасозлигини жадал ривожлантириш, аграр секторни қишлоқ хўжалиги техникалари билан таъминлашни давлат томонидан қўллаб-қувватлашга оид чора-тадбирлар тўғрисида»ги қароридан келиб чиқадиган вазифалар ижросини таъминлаш мақсадида ташкил [этилди](#).

Институт ректори, иқтисодиёт фанлари доктори, профессор Ўқтам Умурзоқов тантанали маросимда сўзга чиқар экан, «Институт бугунги жуда катта рақобат шароитида қишлоқ ва сув хўжалиги учун илғор технологияларни биладиган, замонавий билим ва кўникумаларга эга, рақобатбардош муҳандис кадрлар тайёрлашни ўз олдига асосий мақсад ва вазифа қилиб қўйган».

«Хозирда Ўзбекистон қишлоқ хўжалигига замонавий техника ва технологиялар кенг жорий этилмоқда. Бу, ўз навбатида, мазкур техника ва технологиялар билан ишлай оладиган муҳандис кадрлар тайёрлашни талаб этади. Бундай вазифани бажаришда эса, нафақат АҚШ, балки дунёда ўз илғор технологиялари ва замонавий техникалари билан машҳур бўлган John Deere компаниясининг Ўзбекистондаги расмий дилери ҳамкорлик қўлини чўзди. Ўйлаймизки, John Deere компанияси билан биргалиқда амалга ошираётган бу ишларимиз, соҳада таълим сифатини янада оширишга ва қишлоқ хўжалиги учун энг юқори малакали муҳандис кадрлар тайёрлашга хизмат қиласи», - деди институт ректори Ўқтам Умурзоқов.

«Давлатимиз раҳбари Шавкат Мирзиёев «Ўзагротехсаноатхолдинг» компаниясига ташрифлари чоғида ҳар бир заводда олий ўқув юртларининг факультетларини, олий ўқув юртларида эса, қишлоқ хўжалиги машинасозлиги корхоналари томонидан ишлаб чиқилаётган техникаларнинг ўқув синфлари, макетларини ташкил этишга доир топшириқларни берган эди. Ушбу топшириқнинг ижроси юзасидан дунёning энг йирик қишлоқ хўжалиги техникалари ишлаб чиқарувчи John Deere компанияси ўз ўқув марказини очди.

Таъкидлаш жоизки, бу компания техникалари жуда мураккаб ҳисобланиб, унда энг сўнгги илғор ақлли технологиялардан жуда кенг фойдаланилган. Шу боисдан ҳам институтнинг таълим бериш соҳасида мазкур компания билан ҳамкорликни йўлга қўйиши даргоҳ талабалари учун бекиёс имкониятларни тақдим этади. Бу ерда дарс бераётган домлалар учун ҳам илғор ўқитиш усуслари ва технологияларини ўзлаштиришларига имкон беради», - деди Нодир Отажонов.

«John Deere ушбу институт билан талабаларга замонавий қишлоқ хўжалиги техникалари бўйича

таълим беришда ҳамкорлик қилишдан, қолаверса, шундай имкониятни тақдим этишдан фахр ҳиссини туяди. Ўқув маркази Ўзбекистон аграр соҳасига илғор технологияларни аъло даражада ўзлаштирган малакали мутахассисларни етказиб беришда ўз ҳиссасини қўшади, деб умид қиласиз», - деди CIS Equipment Group раҳбари Жейсон Ҳант.



Ўқув маркази John Deere компаниясининг расмий дилери – Landtech компанияси билан институт ўртасида имзоланган меморандум доирасида ташкил этилган бўлиб, барча ўқитишнинг барча халқаро андазаларига жавоб беради. Тадбир давомида ўқув марказининг энг илғор, халқаро таълим стандартларига жавоб берадиган синфхонаси, амалий машғулотлар ўtkазиш хонасида барпо этилган шароитлар ҳам меҳмонларга таништирилди. Хусусан, замонавий, инновацион жиҳозланган ўқув хонасидаги шарт-шароитлар кўрсатилиб, интерактив доска имкониятлари ҳам намойиш қилинди.

Амалий машғулотлар хонасида John Deere тракторларида қўлланиладиган дизель двигателининг намунаси ҳам жойланган бўлиб, бўлғуси муҳандис талабалар уни қисмларга ажратиб, қайта териш амалиётларини ҳам ўтишлари маълум қилинди.



John Deere (Deere & Company) – қишлоқ хўжалиги, ўрмонсозлик, қурилиш, иригация, боғдорчилик техникаси, тракторлар, йирик комбайн машиналари, экскаваторлар, пахта териш машиналари ва бошқа кўплаб техникалар ишлаб чиқариш бўйича жаҳон етакчиси ҳисобланади. Компания, шунингдек, катта ҳажмли автомобиллар учун двигателлар ишлаб чиқариш билан ҳам шуғулланади. Бош офиси АҚШнинг Иллинойс штати, Молин шаҳрида жойлашган. John Deere – бу техника яратишда мижозларнинг талаб ва эҳтиёжларига жавоб берадиган ускуналар ва ишончли хизмат белгисидир.